

Natürlig die Wirkung belangend/ soll man wissen/ das
 diese Teutsche Terra Sigillata am Waldina/ als bald sie
 eingenommen wirdt / vnd in den Leib kommet/ den selben
 vnd aller desselben glieder Penetrieren vnd durchgehn thut/
 Inmassen dann ein jeder solches empfindt/ der achtung drauff gibt.
 Etlichen werden die hend vñ fuß weil es würckt gar ein wenig schwer
 vnd matth. Etlichen schlaffen sie : Etlichen Zittern sie vnd gruselt
 ihnen darinn/ doch on allen schmerzen/ vnd wehret nicht lang. Vnd
 wo sie etwas vberflüssigs/ vnreins vnd böses/ das in Leib nit gehört/
 vnd die Kranckheiten macht/ findet / So greiffet sie dasselb an/ on al-
 len schmerzen vnd schaden des Leibs glieder. Ist dann nun dieselb
 vitiosa od schadhafft Materia coaguliert (wie dann nit alle Kranck-
 heiten humores oder feuchtungen sein) so löset sie es als bald auff vñ
 verzert als ein vn sichtbar Feuer/ vnd ist doch kein Feuer macht auch
 kein inflammation weder Metallischer noch anderer weiß / wie etwan
 ein neidischer mensch möcht fürgeben. Was aber von ihr nicht kan
 verzert werden/ das schickt sie durch eines jeden glieds nechst eignes
 vnd bequemblichsten außgang hinweg/ also vnd dergestalt/ sol etwas
 per vomitum vnd vndewen weggehn/ so thut es/ gleichwol ander ge-
 stalt auch nit/ als wann der magen durch das gift hart eingenommen
 worden/ vnd vol schleims vñ Gallischer Materien steckē thut. Ferner
 soll etwas durch den Stulgang/ schweiß/ Urin oder wasser auß ge-
 führt werden/ so thut es auch/ doch gar Eindlich/ on schmerzen/ Con-
 uulsion, zwang/ schaden vnd verlegung des leibs glieder / auch nicht
 nach art der groben vnd schedlichen Arzneyē/ als da sein Antimoniz-
 um, Mercurius Præcipitatus, Nieswurß/ Coloquint/ &c. Sondt lest
 also wß gut ist vnverlest bleiben/ sterck vnd krefftig dasselb. Wer aber
 vmb die Præstirten vñd erzeugten Exempla (deren nicht ein kleine
 anzahl) nichts weißt/ der kan vñ wirt die Prob an einem vnvernünff-
 tigen Thier/ dem gift eingegebē/ erfahren. Solche Wirkung aber fin-
 det man nit/ weder im Einhirn/ Türckische Terra Sigillata/ Bolo
 Armeno, Theriaca/ Mithridato/ Gulden ay/ noch ardn arzeneyen/
 so man bisanhero wider die Pestilens vnd gift gebraucht hat. Fern-
 ner vnd zu dem/ so darff man sich mit Purgierē/ Crisieren/ schröpf-
 fen vnd Aderlassen nit vil/ wie man bishero im brauch gehabt/ bemü-
 hen. Dann dardurch die Naturen d' Krancken nur mehr geschwecht/
 so sie doch billich wider das Gift solten gesterck werden. So hat

man auch obseruirt / vnd erfahren/ das bemeltem Proceß nach/mehr an der Pestilens gestorben/dann auffgericht worden.

Souil von der Wirkung dieses Terra Sigillata am Waldina.
Jez will ich berichten / wie man sich mit dem selben vor der berührten schrecklichen Kranckheit der Pestilens Præseruieren vnd bewahren soll.

Mann soll alle morgen nüchtern (weil die Pestis regiert) insonderheit wann mann auß dem hauß gehn will/ein wenig (wie hernach soll angezeigt werden) von disem Terra Sigillata in einē warmen meth oder Suppenbrülin/oder in einem Wehzmuth/ oder Cardo benedict/ oder Salue/oder Alandt/oder Benedict wurk/oder Regel oder Wechholderbeer/ oder Rosmarin oder sonsten gemeinen Wein/ oder deren Wasser einem so hie vnden in der Curirung vñ heylung der Pestilens erzehlt werden / einnehmen/ vnd zwo oder drey stund darauff fasten. Der aber daheim in seinem Gemach oder Behausung bleibt / darffs also oft nicht einnehmen/ Sonder hat an der bereuchung gnug/die sol von Wechholder holz/ reys/ oder beer/ oder Weyrauch/oder Wirhen/ oder von dem Terra Sigillata am Waldina (welche die lieblichst vnd gesundest bereuchung wer) zu gericht sein.

Die gar starcken Leut sollen von dem Terra Sigillata zu einem Præseruatiff gebrauchen drey Gersten oder Pfeffer körner schwer. Die Mittelmaßigen Männer vnd starcken Weibspersonen dritthalb Gersten oder Pfefferkörner schwer. In gemein die weiber/vnd die jez nigen/so von achtzehn Jaren vnd darunder zwey Gerste oder Pfefferkörner schwer. Die schwangern frawen/ Kindbettern vnd kinder vnder zwölff Jaren anderthalb Gersten oder Pfefferkörner schwer. Die kinder von acht Jaren ein Gersten oder Pfefferkorn schwer. Die Kinder von Sechs Jaren ein halb Gersten oder Pfefferkorn schwer. Denen aber bitter ding zu wider / die mögen darzu honig oder zucker mengen/Mögen auch zucker zettel darauff machen/oder in einer durren Feygen einnehmen. Man soll auch stettigs einen Bisemknopff auff die weis (wie volgt) zugericht in henden haben/ daran man reuche. Mann soll der Terra Sigillata am Waldina eins oder zwey groblecht zerstoßen oder zerschneiden/in ein doppelt leinen tüchlein gewicklet / vnd mit einem Essig ein wenig angefeucht / vnd dann in ein Silber oder hülsen Bisemknopff von Wechholder holz gemacht/ thun/vnd oft darzu riechen. Neben dem soll man auch ein zettel diser

Terra

Terra Sigillata am Waldinæ inn ein Leinen oder Seiden tüchlein binden vnd immerzu am halß tragen. Wer viel vnd oft vnder das Volsck kumpt / beuorab zu denen / die mit der bösen Sucht behafft / die sollend ein wenig von diesem Terra Sigillata in Mund nehmen. In der Wochen oder in vierzehnen tagen auffß lengst / soll man ein mal so viel von diesem Terra Sigillata einnehmen / als einer / so allbereit mit der Sucht schon beladen einnehmen muß / Davon man hernach in der Cur vnd heilung gnugsamen bericht finden wirdt. Disß soll zu morgents nüchtern beschehen / darauff ein stund / anderthalb oder zwo / so lang es die krafft erleiden mag geschwist / vnd vier stund vngefährlich nüchtern geblieben / Wer seine stulgång nicht täglich haben kan / der soll sie ihm mit zäpfflein von Alaun / oder Speck oder Seyffen / oder von vier Lot gesotten Honig vnd zwey quintel gestossen Senetblätter vnd ein quintel Salz vermischet / Oder mit andern geringen Purgir Arzneyen / als von Himmel schwertel / oder Senet / oder Engelsieß / oder Zwetschgen / etc. machen. Was einer für Speiß meiden soll / wirdt hernach in der Cur erzehlt. Ein geringer subtiler Wein ist der nützlichest Tranck. Sonsten soll sich auch einer hüten vor füllerey / Zorn / Forcht / Trawrigkeit / Mittagsschlaff / gemeinen Bädern / vnd aller vn sauberkeit / etc.

Also hat man gehört / wie man sich mit diesem Terra Sigillata vor der Pestilenz bewahren soll / Jetzt will ich auch fermer anzeigen / wie man damit dieselb vnd dero zufellige Kranckheiten Curieren vnd heylen soll.

Demnach wenn Gott der H^{Erz} einen mit dieser erschrocklichen Sucht der Pestilenz heimsuchet / So soll er erstlich vnd zuvorderst Gott den Allmechtigen vñ abwendung seines Zorns vñ der Kranckheit / mit rechtschaffner Busß vnd Warhafftem glauben anruffen vñ bitten. Darnach soll er als bald vnd von stundan je ehe je besser diese Terram Sigillatam am Waldinam in nachverzeichneter quantitet vnd gestalt einnehmen / Vnd darauff in einem bett wol zu gedeckt / vn geschlaffen / zwo / drey oder vier stundt / so lang es die krafft vnd natur erleiden mag / schwitzen / vnd Letzlich den Schweiß mit Tüchern gar wol vnd Warm abtrücknen / vnd den Krancken in ein frisch Bett / vnd frische Tücher legen. Den gar starcken Leuten sol man ein ganzes Zeltel / wie es ist geben / Helt einen Scrupel oder den dritten theil von einem quintel. Den Mittelmessigen Mannen vnd Starcken

Weibs personen soll man Sibenzehen oder achtzehen Gersten oder Pfeffer körner schwer vngeserlich geben. In gemein den Weibern/ vñ denen so von achzehen jaren vnd darunder sol man fünffzehen od sechzehen Gersten oder Pfeffer körner schwer vngeserlich geben. Den Schwangern Frauen/ Kindbettern vñ kindern vnder zwölff jaren/ sol man Zwölff oder dreyszehen Gersten oder Pfeffer körner schwer vngeserlich geben. Den kindern von acht jaren sol man acht oder neun Gersten oder Pfeffer körner schwer vngeserlich geben. Kindern vnder Sechs jaren/ soll man Sechs oder Sieben Gersten oder Pfeffer körner schwer vngeserlich geben. Ferner es sey Sommer oder Winters zeit / es kom auch ein person die Pestilenz mit hitz oder frost an/ so mögen es alt vnd junge Leut/ schwangere Frauen/ Kindbettern vnd kinder/ dise Terram Sigillatam einnehmen/ in einẽ kleinen Trüncklein nemlich einen oder zwen Löffel vol gewermbten Cardo benedict/ oder Wein rauten/ oder Erdrauch/ oder Bechedistel/ oder Borago/ oder Erdbeer/ oder Kreuzwurz/ oder Schlüsselblumẽ/ oder Ehrenpreis/ oder Eysenkraut oder Braunellen/ oder Melissen oder Bethonien/ oder Saurampffer wassers/ oder Rosen essigs/ oder ein geringen weissen weins/ ein wenig mit Rosen essig vermischet / d gleichwol gegen den kindern nit sol gebraucht werden. Oder die solche wasser vnd Materien zur not nit haben können / die mögen es in einẽ warmen geringen vnd nit sehr gehöpfften Bier vnd Erbis od Fleisch brülein einnehmen. Welche aber nicht gern bitter ding brauchen/ die mögen es einnehmen in einem Meth/ oder mögen darzu Honig oder Zucker mengen. So auch die Arseney wider von dem kräcken brechẽ oder stossen wolt / sol man jm so oft widerum ein andere geben/ vor angezeigter quantitet vñ gestalt/ bis sie bleiben thut/ doch sol allweg zuuor der mund mit essig vnd wasser vnder einander vermengt/ oder Wein/ oder wasser allein/ welches man in der not haben kan/ wol auß gespület werden. Damit aber auch die Arseney desto lieber bey dem Krancken bleibe/ so sol man ein schnitten Brot (waß es bähet/ wers besser) in essig nese/ darauff Muscatnuß puluer strewe/ vnd dem francken für den mundt heben / vnd darzu riechen lassen. Auch ein vngesotten roh Ey jm in das grübel vnder der gurgel legen. Wann der Patient nicht schwitzen kan/ sol man ihm den Rucken ab vnd ab/ vñ die Solen an beyden Füßen mit Lorber oder Rauten/ od Holder blü/ oder Sanct Johannis kraut blü ol/ on Terpentin zuge-
richt/

richt/warm schmiren/vnd darnach etlich gepratn: zwibel genossen/
vnd halb so viel Holder oder Beckholder Seltz oder Latwergen/
vnd einander gemenet/auff ein leinen tuch Pflasterweiß gestrichē/
vnd auffs wermeß vber den Nabel geschlagen. Oder einen heißen
newen Ziegel stein mit einem leinen tuch in essig geneht/vnngeschla=
gen/zun füssen an die Solen gelegt. Oder man mag vier säcklein
von leinem tuch machen/dieselb mit Schelkraut oder brennend nes=
seln/oder Cardo benedict kraut anfüllen/vnd wann sie ein weil im
wasser gesotten / sol mans ein wenig auß trucken / vnd darnach eins
zwischen den Beinen ob den Knien legen / das ander vnden an die
Solen/das dritt vnder den Rucken/vnd das vierdt vornen auff das
Herz grüblein. Im schwitzen sol der Patient/wie vor vermeldet/ nit
schlafen/auch im der schlaff innerhalb den ersten vier vnnd zwenzig
stunden keins wegs gestattet werden. Wan er aber je sich des schlaf=
fens nicht enthalten köndte/sol man ihn bey der Nasen/Ohren vnd
haar zopffen/auch statts einen schwam̄ oder tüchlein/in scharffen essig
genehet für die Nasen halten. Dieweil er schwizet / sol man den lufft
im gemach mit allerley bereuchung seubern. Man kan auch kein bes=
sere/gesundere vnd lieblichere bereuchung haben / als wann man ein
wenig von dem Terra Sigillata am Waldina auff ein glut leget/
das krefftig vnd sterckt die natur gewaltig vnd verdreibt all böß vnd
schedlich lufft / etc. So etwa der franck im schwitzen ohnmechtig
wirt/sol man ihn nicht geheling auß dem schweyß reyssen vnd külen/
Sonder man sol in im bett erquickē vnd laben mit wolriechenden
vnd köstlichen wassern/als Rosen oder Negel blümen oder Lauendel
essig. Man mag im auch beneben eingeben ein etlich tropffen Zimet=
wasser oder andern köstlichē lebendigen wassern. Item eingemachte
Citronen/oder Margranten/oder Krafft zeltel / oder Rosenzucker/
oder Barago zucker/oder Melissen zucker / oder Beyel zucker/ oder
Erbsal/oder S. Johannis Berlin Saft. Aber die best labung wer/
das man ein gersten korn schwer von dem offit berührten Terra Si=
gillata vnder zimlich vil zucker vermengt/in einem oder zwen Löffel
voll Lauendel/od Melissen /oder Saurampffer oder Rosen wasser
eingebe. Beneben soll man auch nehmen ein Eyer dotter / Wey=
rauch/ Saffran / vnnd Saltz jedes gleich vnnd souil als man mit
zweyen fingern fassen kan / wol vnder einander gemischet/vnd pfla=
sterweiß vber beyde Puls der henden gebunden. Dieser gestalt sol
man

man ihn auch laben / wann ihm nach dem schweiß ohnmächtig werden wolt. Vnd da ihn auch im schwitzen ein solcher grosser durst vberfiel / das er vermeint könt nicht vngetruncken sein / So mag man ihm der jeh bemelten Wasser eins mit einem oder zween Gersten körnern schwer von dē Terra Sigillata am Baldina vnder zimlich vil zucker vermenghet ein guten trunck oder zwen / vnd mehr als sonst zur labung gehört / doch nicht zu sehr kalt zu trincken geben / vnd nicht desto weniger den schweiß gar verrichten / Aber gar nichts getruncken wer am füglichsten. Mann sol auch gut achtung geben / das der Kranck im schwitzen das haupt nit vnder der decke / sonder frey habe / vnd ist gnug das es mit einer schlaffhauben vmbgeben sey / Vnd da auch im schwitzen das haupt mit hitz beschweret wurde / So sol man nemen etlich lebendige Krebsen die selb also lebendig in einē mörser zu einem muez zerknitschen / durch ein Leinen tuch getruckt / vnd ein wenig Rosen oder Holderblust Essig darvnder gemenghet / auff ein toppelt Leinen tuch gestrichen / vnd dann vber beyde schläff vnd stirn gelegt / vnd wann es trucken worden / widerumb in jeh angezeigte Materien eingenezt vnd vbergeschlagen / Dieses so oft gethan / bis die hitz vergangen. An dessen statt mag man auch nemen von vier Eyern das Clar / darunder vier Löffel voll Holder oder Rosen essig sampt einem quintel Gaffer vnd einem quintel Weyrauch klein zerriben vnd gestossen vermenghet / wol vnder einander geklopffet / vnd dann angeregter gestalt vber die schläff vnd stirn geschlagen.

Wann nun der Kranck gnugsamlich geschwizet / so sol man das bett / wie oben berichtet / mit rein geweschnen tüchern erfrischen / oder da es in sein vermögen / sol man ihn in ein ander bett vnd Gemach / inn welchem der Luft auff vor angezeigter weis gereiniget / legen. Nach dem Schweiß zwo stundt vngefährlich (wann es ihm anderst nicht zu lang vnd er zu Schwach) sol man ihm geben ein Hennen oder Capaun oder ein Krefftigis fleisch Suplein / das zimlich wol geseuwret sey mit Essig / vnd diß sol oft beschehen / damit er sein gemach widerumb zu Krefften gebracht werde. Er sol etlich tag / starck / grob / schleimig / scharpff gewürzt vnd vnderwige speiß meiden / vnangesehen / ob er sich schon wol befunde / Vnd was er sonst essen thut / das sol ein wenig sawr gemacht werden von Essig oder von sauren Säfften / als Erbsal / oder Johannis Berlein / oder Weichsten oder Sauwrampffer / oder Agrest / oder Citronen / oder Limonien / oder
saur Pom-

saur Pomeranzen/2ē. Sein tranck sol sein ein frisch Brunnenwasser/
darinnen zimlich vil zucker Rosat/oder (das noch besser wer) der jek be-
rürten Säfften einer zerriben/sonderlich der Erbsal Safft/ Vnd bes-
toden auch ein schnitten Brots / ein geweicht sey. Solches Tranck
ist ihm gesunder als gesotten Gerstenwasser / welche die Francken nur
noch mehr schleimiger machen. Den wein sol er meyden auff vierze-
hen tag vngefehrlich/es wer dann sach/das einer gar Krafftlos vnd
schwach/auch des Weins gewohnet/ So mag man ihm als dann ein
geringen / Subtillen weissen Wein zutrincken zulassen/ Doch das er
mit Rosen/oder Sauwrampffer/oder Borago oder Melissen wasser/
oder mit nechst hieoben angezeigtem tranck gemischet sey. Neben dem
essen vnd trincken/sol man stettigs andere gutte sterckung gebrauchē
als die jenigen / so ich oben erzehlt. Vnd sol in sonderheit von diesem
nach verzeichneten Latwerg im tag gar oft schlecken / Man sol nem-
men Rosenhonig drey lot / Erbsal Safft zwey lot / Engelsies vnd
Fenchel samen klein zerstoffen jedes ein quintel / vñ alles wol vnder-
einander gemenget. Dieser Latwerg krefftigt / kält/nimpt den husten
weg/vnd behelt den Leib sein natürlich offen/Wer in siesser wil habē/
sol noch ein lot Rosenhonig darzu mengen. In henden sol er allweg
etwas wolriechendts haben/daran er reuche / Vnd kan nichts liebli-
chers vnd das in mehr erquickē/haben/Dann den Bisemknopff/so ich
droben in der Praferuierung vnd bewahrung vor der Pestilens ver-
ordnet. Außwendig sol man ihm die lincke bru st / darunder dasherz
ligt mit diesem nachfolgenden Sälblein offte schmieren. Mann sol
nehmen Melissen ein quintlein / Saffran vnd Gaffer jedes ein halb
quintel mit frischem butter zu einem Sälblein gemacht. Dis sterckt
das herz sehr wol/Vnd mag vor/in vnd nach dem schweiß gebraucht
werden. Er sol auch den mundt mit deren Materien einer so hieoben
darzu verzeichnet offte spülen.

Wann dann nun der Kranck den ersten Schweiß vollbracht / so
sol er nach acht oder neun stunden (wann es ihm anderst krafft halben
müglich) widerumb ein Terram Sigillatam einnehmen / vnd sich
aller dings halten / wie hieoben erzehlt. Übersteht er nun auch diesen
schweiß/So bedarff er sich hernach nichts mehr befahren/wann auch
die Sucht schon vber die 24. stunden angestanden / Es wölle dann
Gott der Herz sonderlich einen straffen / Oder es ist ein sen von Gott
auffgesetztes Zill verhandē. Es sol auch nachvolgends der franck nicht
vnder=

Widerlassen / noch alle tag / oder auff's wenigst vber den andern tag /
allwegen so lang er sich vbel befindet / auff acht tag vngeschlich ein
Terram Sigillatam angezeigter gestalt / ein zunehmen / Vnd allwe-
gen dar auff geschwist / Damit das Giffit gar durch Gottes hilff weg
getrieben werde / vnd nit wie es bald beschicht wider komme. Doch
darffer hernach so lang nit mehr schwizen als zuuor.

Ferner wann sich Beulen / Drüsen oder Blattern erzeugen / so sol
man die bletter von Braunbeer staudē / oder Flöhkraut (d̄z noch besser
vñ krefftiger wer) mit den schwarze oder roten flecken in wein sieden /
vnd Pflasterweiß ein wenig warm vberschlagen / d̄z weicht vñ macht
nit allein zeitig die beulen vñ geschwären / sonder zeucht auch d̄z giffit
gewaltig vom herzen. Oder man mag an deren statt nemen weissen
mel / Honig / vñ ein wenig Salz / ein teiglein dar auß gemacht vñ vber
geschlagē. Oder man mag auß Bolo Armeno vñ Feygē wol vnder
einander gestossen / ein Pflaster machē. Oder man mag nemen einen
zimlichen grossen gebratnen zwibel / oder vogelleim / vñ darunder ein
gepuluerets Zeltlein des mehr bemeltens Terra Sigillata mengen /
vnd Pflasterweiß / wie angezeigt / vbergelegt. Doch sol man achtung
geben / das solche pflaster auff's wenigst im tag zweymal ernewret / vñ
in der mitte etwas geöffnet werden / damit die Giffitigen demiff auß-
schlagen mögen. Wann nun die Beulen also zimlich herfür gezogen /
vnd aber von ihñ selbst nicht auff brechen wolten / So sol man sie am
dritten tag hernach oder zuuor / ob sie schon nit zeitig / mit einer flit-
ten öffnen. Darnach sol man die offtbemelt Terram Sigillatam /
oder Alaun / oder Vitriol / oder Weinstein klein gepuluert mit honig
vnd Eyr doter / zu einem Sälblein machen / vnd ein festlein damit be-
streichen / vnd in den schaden legen. Darüber sol man auch nach ver-
zeichnets am Baldinisch Pflaster legen. Oder man mag auch eben
mit disem am Baldinischen Pflaster ein wiglein od festlein bestrei-
chen / in den schaden gelegt / vnd von aussen dar auff das Pflaster / wie
jetz bemelt. Dardurch wirdt nit allem das faul fleisch / Eytter / vnd
alle oberflüssige vnreinigkeit auß den geschwehren weg genommen /
Sonder sie werden auch dardurch von grund auß gereinigt / vnd zu
vollkommlicher heilung gebracht. Das Am Baldinisch Pflaster sol
also zugericht werden. Man sol Ammoniack klein zerstoßen vier lot
in einem essig zerlassen / vñnd suttiglich sieden / vñnd dann also heiß
in einen Sack seihen vnd trucken / So bleibt das vñrein dahin-
den. Dar

den. Darnach sol man was durch gesigen vnd getruckt / widerumb
 fieden so lang bis der essig gar daruon gerochen. Man sols auch stet-
 tigs rüren / Damit es nit anbrenne. Dann sol man in einem andern
 besondern verglasterten Hasen / oder pfannen zehen lot wachs vnd
 Sechs lot Hasenschmaltz bey einem Feurlin gar langsam zergerh
 lassen / vnd wann es ein wenig kühl worden / So sol man darnach den
 vorgesotten Gummi / vnd darzu Dammeharz zehen lot / Item Ter-
 pentin / Myrrhen / Meusörlein kraut / Tormentil jedes zwey lot da-
 rein thun / Doch sol alles zuuor klein gepuluert werde / Was sich pul-
 uern lest vnd also zu einem Pflaster gemacht. An statt des Ammo-
 niaci mag man so viel Galbanj oder Bdellij nemen. An statt des
 Hasenschmaltz souil Leinöls / aber das hasen schmaltz wer besser. An
 statt der Myrrhen souil Weyrach oder Mastix. An stat des Meus-
 örlein kraut souil Magnet / oder gelbe Agstein / der Magnet aber wer
 am besten. An statt der Tormentil / souil Natterwurz oder Boli Ar-
 meni. Dis Pflaster ist auch gar trefflich gut zur weichung / herfür-
 zierung vnd zeitigmachung der beulen vnd geschwehren. Das glied
 herumb ringsweiß beuorab wann es ein schwarze blatter ist / sol man
 mit Garben / Wegdritt / Genseric / Gulden gunsel / breiten oder spi-
 zigen wegrich safft schmieren / Damit es nit weiter vmb sich brenne.
 Oder man mag nemen Bolum Armenum, vnd mit weissen Bilgen
 od Rosen öl ein Sälblein gemacht / vñ wie jeh angezeigt / gebraucht.

Letzlich sol man hiebey wissen / wann sich zufelliger weis (wie es
 oft beschicht) begeben / das einer nach dieser schwehren Krankheit
 Würm oder durchflüss bekeme / das er auch darfür am v. l. beneñten
 Terra Sigillata ein gewisse Arkeney haben kan. Aber es darff ei-
 ner auffz einneinen nit schwitzen / wie man in der Peste thun muß.
 Es sol auch ein jede Person irē alter nach vier Hersten oder Pfeffer
 körner weniger nemen / als droben verzeichnet. Die jenigen so würm
 haben / sollen sich auch beneben in vñd vmb den Nabel mit S. Jo-
 hanns kraut / oder Kauten / oder Wehrmuth öl zuuor zimlich ge-
 wermēt / oft im tag schmieren. Die aber mit den durchflüssen behafft
 seind / die sollen auch beneben Rütten Latwerg oder Saurampffer
 safft / oder Muscatnus / oder Tormentill / oder Natterwurz / oder
 Mandelmillich vñd dergleichen sachen brauchen. Doch sollen sie
 mit diesen stücken nit zu geheling gestellt werden.

Souil sey geredt / wie vñd was gestalt man (mit verleyhung

Göttlicher Gnaden) durch die Terram Sigillatam am Waldinam die Pestilenz vnd der selben zufälligen Franckheiten Curiren vnd sich darvor bewaren sol. Gesundt wil ich auch weyter anzeigen wie es wider andere schwere Franckheiten mehr zu gebrauchen sey.

Lixirlich wann einem Giffte von Thieren / Metallen / Mineralien / Kreuteren / Schweimen / oder andern gewechsen inn speys / oder tranck gegeben wirdt / der sol von stundan diese Terram Sigillatam in einem guten trunck gemeinen warmen Wassers / oder Honig wassers / oder Baumöls / oder Nussöls / oder bitter Mandelöls / oder Behrmut Weins (der sehr bitter ist) einnehmen / vnd nicht dar auff schwitzen / das wirt ihn alsbald vndewendt machen / vnd von ihm weg treyben / was Giffte im Magen ligt. Wann er also gnugsam vngedewet / so sol er nit lang feyren / sonder als bald widerum ein Terram Sigillatam in einem kleinen trüncklein guten warmen Weins / oder der oberzehlten Wasser oder Träncker einem einnehmen / in welcher der jenig / so mit der Pestilenz behafft / einnehmen sol / vñ dar auff gar wol schwitzē / So wirt dardurch das vbrig giffte / so sich in dē Leib auß getheilt / weggetriben. Da er sich aber auff diß / noch ein wenig math vnd schwach befunde / so sol er nit nach lassen / hernach noch auff ein etlich tag alle morgen / oder auffs wenigst vber den andern tag allzeit nüchtern ein Terram Sigillatam ein zunehmen / vñnd dar auff geschwitzt / damit das Giffte gar auß dem Leib kömē. Man sol auch alhier mercken / wann einer morgens nüchtern dise Terram Sigillatam einnehmen thut / das im denselben tag / kein giffte / wie groß es ist / schaden kan. Vnd ist vnnötig / das einer dieser gestalt dar auff schwitze.

Vm andern / Wann einer von einem Wütenden Hundt / Schlangen / Nattern / Scorpion / Spinnen / oder andern Thiere gebissen oder gestochen wirdt / so sol er diese Terram Sigillatam auch inn deren Wasser oder Träncker einem einnehmen in welchem der jenig / so mit der Pestilenz behafft / einnehmen sol / Vnd wol dar auff schwitzen / vnd sich hernach fernner aller dings halten / wie jez von dem eingenommen giffte gemelt. Vber den biß oder stich / sol man deren Pflaster eins / so ich droben bey den Pestilenz Beulen vnd Geschwären erzelt / vberschlagen vnd darnach zur heylung bringen / wie am selben ort angezeygt.

Vm dritten / Wann einer das Seytten Stechen oder Brustgeschwer / Pleuritis genant / hat / So sol er diese Terram Sigillatam

tam in einem kleinen trlincklein/Caro benedict oder Vchdistel/oder
Wegwart/oder Pfaffenblatten/ Oder Manstrew/ oder weyß Weg
distel/ oder Bocksbart/oder Borago/oder Pastemettkraut/oder Sch=
senzungen / oder Rittersporn / oder Braunnellen/ oder Gulden Sun=
sel / oder Stallkraut wasser/oder inn einem Meth/ oder Fleisch oder
Erbis brülen einnehmen/ vnd dar auff schwizen so lang es die krafft
erdulden mag. Wer aber jez berürte wasser nicht haben kan / der sied
die kreuter in gemein Brunnwasser/vnd brauch es/wie bemelt. Nach
acht oder neun stunden(wann es im anderst krafft halben müglich) sol
er widerumb ein Terram Sigillatam einnehmen/vnd abermah lens
dar auff schwizen. Volgends sol er sich die andern tag halten / wie
droben von den jenigen gemelt so an der Pestilens franck ligen. Er
sol auch im tag etlich mal / bevorab zu morgents vnd nachts von dē
nachfolgenden Franck trincken. Man sol Cardobenedict kraut vier
lot/vnd Rosen honig oder gemeinen Honig zwölff lot in einer Maß
wasser/auff ein gute stund sieden lassen /durch ein leines Tuch siehen/
vnd dann was durch gesigen/gebraucht. An statt der Cardobenedict
mag man neimen/ der andern jez bemeltē kreutern eins. Aber Car do
benedict hat vor allen andern den preis. Beneben sol er auch von
der Latwerg / von Engelsies/ Fenchelsamen / Erbsalsafft vnd Rosen
honig zugericht/so man droben in der Pestilens verzeychnet findt/im
tag gar offte schlecken/vn kan so offte darvon nit schlecken/ es ist im gut.
Eufferlich sol man der schmerzleydenten seitē also zu hilff komē. Man
sol auch Car do benedict / oder der andern jezberürten kreuter eins/in
Baumöl/oder butter/oder Leinöl (Dz am bestē/wer es geruchs halben
leiden möchte) sieden lassen/ durch ein leines tuch seyhen vnd trucken/
wz durch gesiegen vnd getruckt mit demselben sol man die schmerzley=
dent seyten gar offte warm schmiren. Man sol auch darinn ein wüllen
fleck eines tällers groß/er sey blau/rot/oder ander farben nehen/vnd
dz öl ein wenig davon abtrucken / vnd warm ober die stechend seyten
gelegt/ Vnd dis sol auch offte beschehen. Die weil auch bey diser franck=
heit grosse hitz ist/so sol man vber beide schlaff/stirn vnd Puls vorn an
beiden Henden / deren vber schlag einen/so ich droben in der Pestilens
vnd hieunden in der Vngerischen franckheit verordnet anwenden.
Die solen an Füßen sol man mit essig darinn sals vermischet sey offte
reiben. Man sol auch vielmalens sich mit essig vnd wasser vnd einan=
der vermengt/oder mit deren Sargelwasser einē/so man hieunden in

der Vngerischen Franckheit verzeichnet findt/gurglen/vnd die Zungen schaben. Zu seinem täglichen vnnnd stetten tranck/ sol er eben dis tranck brauchen/ so ich droben den jenigen/die mit der Pestilens be-
haffet/verordnet. Durch dise mittel allein/ werden die Brüst ge-
schwehr/Scythen stechen/Husten vnd enge des Athems/ Zumal on
die Aderläß abgewendet. Diser gestalt ist auch dise Terra Sigillata
wider andere inwendig giftigen geschwehren mehrten anzuwenden.

Vm Bierdien/ Wann einer mit dem Pestilensischen/ giftig
vnd hitzigem Fieber/die Vngerisch oder new Hauptfranckheit
genant/behafft wirt/ So sol er dise Terram Sigillatam in de-
ren wasser einem/die ich droben in der Pestilens vnd Brustgeschwe-
ren verordnet einneiffen/ vnnnd gar wol darauff schwitzen/ auch sich
nachfolgends aller dings halten/wie von den selben Franckheiten an-
gezeigt. Den Latwerg von Engelsieß/Fenchel/ꝛ. dessen verzeichnus
man droben in der Pestilens findt/ sol er gar oft vnd fleissig brau-
chen. Vber bede schläff/ stirn/ pulß vorn an bedenhenden/vnd vmb
den halß/sol man Flöhkraut/oder Gensereich/in Rosen/oder holder-
blü/ oder gemeinen essig gesotten/vberschlagen/vnd oft erfrischen.
Oder man mag auch an deren statt/den vberschlag von den Kreb-
sen/oder die andern/so ich droben in der Pestilens/zu abwendung des
Haupts hitz verordnet/gebrauchen. Vorn am Leyb vber bede brüß/
sol man auch jeh bemelten vberschlag von den Krebsen anwenden.
Oder man mag an dessen statt ein doppelt leinen thuch/in ein Rosen
oder Holderblü/oder gemeinen essig/darinn zimlich vil klein geriben
Allaun vermenget sey/nachen vnd vberschlagen/ꝛ. Die Solen an füß-
sen/sol man ihm oft mit essig darinn Saltz vermischet sey/reyben.
Dis sol alles ein gute weil nach dem schweiß beschehe. Aber der vber-
schlag vber die schläff/stirn/ pulß vnd vmb den Halß/mag auch im
schwitzen gebraucht werden. Die Breun sol also abgewendet werde.
Man sol nemen den Safft von Lebendigen gestoffnen Krebsen/vnd
Rosen oder Holderblü/oder gemeinen Essig jedes gleich/wol vnder-
einander gerürt/vnd sich oft damit gegurgelt. Oder man sol an
dessen statt der nachfolgenden wasser eins gebrauchen. Man sol
nemen ein halbe maß Braunellen/ oder Hauswurß/ oder Saus-
rampffer/oder Schfen zungē/oder Vehedistel/oder Lindenblü/oder
breitwegrich/oder Saurklee/oder Sieblumen/oder Wangold/oder
Rosen wasser/vñ vnder deren wassern eins/zwen löffel vol Saurach
safft/

Safft/vnd ein halb lot Salniter mengen/vñ sich/wie bemelt offt gurgeln. An statt des Saurach safft mag man auch nemen Maulber oder S. Johannis Berlein Safft. Man sol auch die zung offt mit einem zungen scheberlein schaben/auch ein schwemblein/oder thüchlein von einem Scharlach an ein riedlein binden in diß wasser nesi/vnd also hinden in Hals fahren / vnd alles wol darmit außseubern. Man mag auch wol bis weillen/vom bemelten wasser etwas hinab in Leib lauffen lassen. Zu seinem täglichen vnd stetten Tranck/sol er eben diß tranck brauchen / so ich droben in der Pestilenz verordnet. Vor der Laß sol man sich als einem Gift hüten. Diese krankheit hat ein theil vermeinte ärzt auff ein news widerum in die schul gefürt/das sie ihren lang hergeübten Methodum oder Proceß verendert / das aber (leyder) erst nach grossen schaden vnd verderbung der francken beschehen / Gott verzeihe ihnen/vñnd geb gnad / das sie sich auch in andern stücken mehr darinn sie hochlich irren/ weisen lassen. Wer vor dieser krankheit/auch obberürten Seitten stechen/vnd Brust geschweren/ wil bewahrt sein / der sols wochendtllich anwenden wie droben in der Praeseruierung der Pestilenz angedeutet.

Zum Fünfften kan man dise Terram Sigillatā nusslich brauchen/wider das Vierteglich vnd allerley Fieber/wann mans in deren wasser oder trancken einem/ so ich droben in der Pestilenz vnd Brustgeschwehren verordnet / zuo stundt zuuor che das Fieber kōmen sol/einnehmen/vnd wol darauff schwitzen thut/vñ diß sol hernach so offt beschehen / bis das Fieber gar nach gelassen. Wann der Magen (Inmassen offter mallens beschicht) auff geschwellen thut/ So sol man in im tag etlich mal mit deren öler einem/so ich hernach im Grünen verordnen werde schmiren / vnd nach verzeichnetes pflaster darüber legen. Man sol nemen zuo oder drey gauffen vol Haber oder Weizen kleyen/in ein hafsen oder pfann gethan / darüber soviel effig gossen/das es ein muez gebe/ein halbe stund vngeschrlich gesotten/dann in ein leines Säcklein Pflasterweiß gestrichen/vnd zimlich warm (das der Kranck erleiden mag) vber den magen gelegt. Wann es kalt worden/sol mans widerumb wermen/vñ offt ein frische Materie darzu genōmen. Ehe das man aber diese Terram Sigillatā anwendet/sol die Person zuuor wol purgiert sein. Vnd also werden die Fieber von grund auß curirt / außgenōmen die Schwindsucht/darzu noch etwas mehrs gehören thut / dauon aber zu anderer zeit gehandelt sol werden.

Zum

Zum Sechsten ist diese Terra Sigillata gar dienlich vnd gut wider die Wasserfucht vnd allerley Farbfucht / so man sonst Gelbsucht nendt / anderst nit gebraucht als wie jehundt von den Fiebern berichtet.

Zum Sibendē ist dise Terra Sigillata gut wider allerley Grimmen oder Reissen im Leib / wann mans in einem kleinen trüncklein warmen Baumöl / oder Sieß mandel öl / oder zerlassen butter / oder Lein oder Lor öl (welche zwey dem sie nit zu wider / am besten weren) einnehmen thut. Wer es also nicht wol trincken kan / der mag darzu mengen ein Muscatell / oder Reinfall / oder sonst einen guten siessen wein. Wer auch schmerzens halben nit darauff schwitzen kan / der darff nit schwitzen / Aber sol sich sonst warm halten. Inn vnd vmb den Nabel / vnd wo er sich schmerzlich befindet / sol man ihn mit nachfolgendem öl oder Selblein offft vnd viel mal warm schmiren. Man sol Cardo benedict kraut inn Baum oder Lein öl oder Butter zwei stundt oder etwas lengers sieden lassen / vnd darnach durchseyhen vnd trucken / vnd was durch gesigen vnd getruckt / mit demselben sol man ihn (wie angezeigt) schmiren. Diese jeh bemelte öl weren viel krefftiger wann mans nach dem sieden Distilliert hett / vnd zur notturfft behalten. Man sol auch einen Wüllen fleck eines Tällers groß in dieser ölen eins nehen / das öl ein wenig darvon abtrucken / vnd warm vber den Nabel legen vnd offft erwidern. An statt Cardo benedict mag man Schelkraut / oder Brennendtnessel / oder Berenklaw / oder Bermuth nemen. Vor kaltem vnd saurem essen vnd trincken sol er sich als einem Giffthütten. Also auch vor Purgieren vnd Erstickieren / Damit man in gemein die Leut pflegt zu blagen / Dann dar durch die Contractur (wie man auß erfahrung weiß) geziglet wirdt. Wann die Kranckheit auff ein eingenommen Terra Sigillata nit gar weg gangen / so sol mann noch öffter eins brauchen.

Zum achten wirdt durch diese Terra Sigillata die Contractur oder Leme von grundt auß abgewendet / Man sols in einem kleinen trüncklein warmen Rautten / oder Erdrauch / oder Cardo benedict wasser / oder inn einem Meth oder Bier / oder Reinfall / oder Maluasier / oder Muscatell / oder Alandt / oder Cardo benedict / oder Salue / oder Benedict wurz / od Negel / oder Beckholderbeer / od Rosmarin / oder sonst gemeinen Wein oder Suppenbrülein / einnehmen / vñ in einem schweißbad (das allein von Beckholder Steudlein / oder

oder Schellkraut/oder Berenklaw/oder Ehrenpreis/oder Gamander/oder Menwelwurz/oder Tausentgulden Kraut sol zugericht sein) gar wol darauff schwißen/so lang es die krafft vnd natur erleyden mag. Im bad sol man beneben die Juncturen oder geleych mit deren öl oder Salben einer / so ich nechst hieoben im Grimmigen zum bauch außwendig verordnet gar wol schmieren. Der bader sol man etlich vnd vil brauchen / vnd alle tag oder vber den andern tag eins. Wann mans aber nit alle tag braucht/so soll man denselben tag/an welche man ruhet/die Juncturen oder geleych (wie auch sonst wann man badt) zu morgens/vnder tags/ vnd nachts mit bemelten öler oder Salben einer warm schmieren. Wer mit diser krankheit behafft/ sol sich eben vor dem hüten/darvor sich hüten sol/so das Grimmigen hat.

Zum neunnden/ Ist dise Terra Sigillata gar ein bewerte Arzenei zu dem Gries oder Sandt / Harn wind vnd verhaltung des wassers. Es sol ein jede Person ihrem alter nach vier gersten oder Pfeffer körner weniger als droben in Curirung vnd heylung der Pestilenz verzeichnet/in einẽ kleinen trüncklein weckholderbeer/oder Erdber/oder Cardo benedict/oder harnkraut/oder Stallkraut/oder Storckenschnabel /oder Vibernelkraut /oder Peterlinkraut/oder Meerhirschen kraut/oder Körperffel/oder Manstrew wasser/oder in einem Meth/oder Keinsal/oder Allandt/oder Cardo benedict/oder Wehrmuth/oder Benedict wurz/oder Rosmarin oder Weckholder beer/oder sonst gemeinen Wein einneimen / vnd gleich darauff in ein Lenden bad / allein von acht oder neun handvol Stallkraut oder Manstrew kraut/oder Weckholder steudlein/oder Sanct Johannis kraut zugericht/bis an nabel sitzen/vnd so lang baden bis der schmerz weg gangen. Man sol aber achtung geben / das das bad/nit zu heis seye. Nach dem bad sol man die Lenden oder geschlossen mit Leinöl/darinn Manstrew oder Stallkraut gesotten sey/oder mit S. Johannis öl warm schmieren. Wann durch ein bad der Sandt nit gar weg genommen / so sol man folgende zeit öfter eins brauchen/Vnd so offte bis man nichts mehr spüren thut. Ist auch sach/dz sich ein grosse verstopffung des Leibs (wie gemeinlich bey diesem anligen beschicht) angezett/so sol man zuuor derẽ Stulzäfflin eins/ so ich droben in der Praeseruierung vnd bewahrung vor der Pestilenz verordnet/anwenden/vnd weren gleichwol hierzu die lest gesetzten Stulzäfflin von Senet zugericht am besten. Der aber auff den Gries oder Sandt

Genaturt vnd hinfürs daruor wil bewahret sein/der sol seinem alter nach wechentlich einmal oder zwey/oder drey mal auff's meist von diesem Terra Sigillata souil vnd der gestalt morgents nüchtern einnehmen / als droben in der Präseruierung vor der Pestilens verordnet. Doch wer auch beneben nutz vnd dienstlich / das einer Monatlich ein geringe Purgation gebraucht het. Wer diesem Raht nach kompt/darff sich des Griefs oder Sandts nit besorgen.

Dum Zehenden / Ist dise Terra Sigillata gut zur Reinigung der Muetter/vnd verhaltung der Weiber Blumen. Man sols einnehmen in einem kleinen trüncklein Cardo benedict/oder Bevenklaw/oder Beyfuß/oder Metter/oder Wegwart/oder Melissen/oder Bethonica / oder Andorn/oder Erdtrauch/oder Tausend gulden wasser. Oder wann man diser wasser eins nit haben kan/sol man an deren statt Cardo benedict/oder Allandt/oder Wehrmuth/ oder Rosmarin/oder Beckholder beer oder sonst gemeinen wein/ oder ein warmes Suppen brülein gebrauchen/vnd wol darauß geschwist. In vnd vmb den Nabel/Geschlossen vñ hinden am Creuz des Ruckens/sol man die krank Person mit deren kreuter ölen oder Sälblin einnem/so ich im Grünen verordnet/offt vnd etlich mal warm schmieren/vnd sich auch sonst vnd nachfolgents halten/wie im Grünen vermelt. Ehe das man aber diese Terram Sigillatam braucht/sol der Leib zuuor zimlich purgirt sein.

Dum Elfften / Ist diese Terra Sigillata gut für das Muetterwehe/vnd auffstossung derselben. Man sols einnehmen in deren wasser oder trüncker einem/so ich nechst hieoben in der Muetterreinigung verordnet/vnd gar wol darauß schwizen. In vnd vmb den Nabel / sol man die krank Person mit nachverzeichneten öl oder Sälblin oft vnd vil mallens marm schmieren. Man sol Metterkraut im Baum oder Ecin / oder Nuß öl / oder butter sieden lassen/vnd darauß ein öl oder Sälblin machen/wie droben im Grünen angezeigt. Man sol auch einen wullen steck eines tällers groß darcin setzen/vnd das öl ein wenig abtrucklen vñnd warm vber den Nabel legen. An Metterkraut statt mag man nemen Stabwurz/od stinckhendi Gamillen/oder Liebstückel. Man sol ihr auch der jez gedachten kreuter eins stetigs für die Naslöcher halten/daran sie rieche. Sonsten vnd nachfolgends sol sie sich halten aller dings / wie im Grimmen angezeigt.

Zum

Zum Zwölfften / Ist dise Terra Sigillata gut wider das Ruckē
wehe / so von flüssen oder geblüt kompt. Man solt einnehmen in
deren wasser oder Träncker einē / so ich droben in der reinigung
der Muetter verordnet / vnd gar wol darauff schwizen. Vor vnd
nach dem schweiß / sol man ihn mit deren Kreuter ölen oder Sälblin
einem / so ich droben im Grimen verzeichnet / an dem Rucken da er
sich schmerzlich empfindet schmiren.

Zum dreyzehenden / Ist diese Terra Sigillata gut zu auß trey-
bung alles verstockten bluts / auch zur reinigung des gansen ge-
blüts im Leib / Item zu allen vnwissenden / vnerkanten / gehelin-
gen franckheiten. Man solt eben also brauchen / Wie jez vom Ru-
ckenwehe gemeldet. Wer es auch im Jar etlich mal einnimpt / vnd
darauff in einem Bett oder kreuter bad (von deren kreutern einem /
so ich droben in der Contractur oder Leime verzeichnet / zugericht)
wol schwizen thut / der darff kein Ader öffnen lassen / vnd ist jm auch
vil vnd weit besser / nusslicher vnd gesunder / dann das Aderlassen /
dardurch bißweillen mehr guts dann böß weg genommen wirt. In
Summa es ist ein solch gwaltige reinigung des geblüts / dardurch
auch der Aussatz kan vertriben werden / Inmassen ich dann darmit
etlichen an diser schwehren franckheit (wie wissentlich) geholffen.

Zum vierzehenden / Kan man dise Terram Sigillatam ganz
berspreußlich brauchen zur Fallend sucht / Freyß oder Vergicht /
Schlag oder Gewalt Gottes / Labung vnd erquickung des Le-
bens / Wie ich dann damit gar vil Leut / so in Todtsnöten gelegen /
vnd gar nit mehr reden können / der massen erquicket / das sie die sprach
widerumb bekommen. In diesen fellen / sol man der Terra Sigillata
so viel eingeben / als droben inn der Praeseruierung vnd bewahrung
vor der Pestilens berichtet. Wann man aber die Fallend sucht vnd
Schlag von grund auß heilen wil / so muß man sie zuuer wol Pur-
giren / vnd hernach offtermallens dieser Terra Sigillata so vil ein-
geben / als droben in der Curirung vnd heylung der Pestilens ver-
ordnet / vnd allweg darauff geschwizt.

Zum Fünffzehenden / Wer in der wochen ein mal oder zwey von
diesem Terra Sigillata etwas einnimpt / dem wirt das haupt /
Bedechniß / Vernunft / Sinn / vnd der ganz Leib gewaltig ge-
streckt. Es hat auch einer daran ein guts Praeseruatiff für dē schwin-
del vnd villerley franckheiten. Wie viel aber ein jede Person jes al-

ters auff einmal einneimen sol / wirt man droben in der Praferuierung vnd bewahrung vor der Pestilenz gnugsam bericht finden.

Zum Sechsehenden / vnd Summariter zu melden / ist diese Terra Sigillata ein krefftig vnd bewerte Arseney zu den Francken / vnd des Milch / vñ allerley anderer innwendiger glieder verstopffung / auch zu andern krankheitē noch vil mehr / vnd ist bevorab zu diesen krankheiten zu brauchen / darzu man bisshero das Indianisch holtz / so wir doch bey vns in Teutschland dergleichen holtzer viel besser vnser Constitution nach vnd hauffend weiß wachsend haben / davon ich in meinem Herbario (wils Gott) wie auch von andern baumen / kreutern / wurzen / ꝛc. Mehr / so bey vns ganz gemein / vnd aber doch jr Tugenden vnd krafft bis anherome erkandt / vnd im brauch gewesen / außfürlich vnd mit rechtem grunde berichten wil) gebraucht / Vnd was diß holtz nicht kan verrichten / verricht diese Terra Sigillata. Das es aber zu souil krankheiten gut vnd ersprußlich / darff sich niemand verwundern / Dañ die Proben vnd Exempel am tag / kans auch / wañ es die noth erfordert nit mit wenig Rationibus vnd Argumentis darthun / Inmassen dann wol etliche in diesem meinem bericht (wer achtung darauff gibt) zu finden seind. Aber du mein widersacher / wer du bist / sihe an dein Indianisch holtz / dein Teriacum / dein Nitridatum / dein Auream Alexandrinam / dein Agaricum / dein Turbit / dein Rhabarbarum / deine Hieras / deine Phylonia / deine bader / ꝛc. So wirt dir schon geantwortet sein. Wer dem Gewicht vnd Bericht nach handelt / wirt nit irren.

Zum Sibenzehenden / Damit am Bericht nichts mangle / so sol man allhie etliche Regel mercken. Anfenglich wann man die Wasser so hin vnd wider in diesem Bericht verordnet nit haben kan / Sol man an deren Statt (wie es auch besser wer) die kreuter in wasser sieden vnd (wie bemelt) brauchen. Vnd ob woln ich subtiler vnd künstlichere zubereitungen wuste anzuzeigen / so laß ichs doch / damit der Bericht nit zu groß werde / verbleiben. Es wurd auch nit ein jeder den fleiß vnd mühe darzu anwenden. Item dieweil nit vberal bey den krankheitē berichtet / wie vil man des Terræ Sigillatæ einneimen sol / so sol man wissen / das allweg ein jede Person ihrem alter nach / souil einneimen sol / als droben in der Curirung vnd heylung der Pestilenz ordenlich verzeichnet. Item man sol auch fleißig mercken wann auff ein mal durch ein eingengornne Terra Sigillata die

die krankheit nit gar weggangen (wie nit allzeit wol m̄glich) so sol man offter eins brauchen/kans auch einer nit alle tag nacheinander einnehmen/so mag er allweg einen tag ruhen/vñ auff den dritten tag hernach brauchen/vnd also fort an / bevorab/wann es nit giftig vñ gar hefftige krankheiten seind. Item was in krankheiten für zufell sich begeben/wirt einer bericht haben/da ich von der Pestilens gehandelt. Item es sol ein jeder wol wissen/das er grob vnde wige speiß vnd tranck meyden sol. Item wann einem die Bitterkeit in diesem Terra Sigillata zu wider wer/So mag es einer einnehmen (es sey gleich was für ein krankheit/darzu es/wie obē berichtet/gut ist) in einem mech/oder mag es vnder Zucker oder Honig/weil es nicht mil ist / mengen. Item man sol achtung geben/dz mans morgents nüchtern einneim/vñ brauche/vnd drey oder vier stund vngefēhrlich darauff faste/ Insonderheit wan es nit giftig/geschwind vñ gar schmerzhliche krankheiten seind. Dann in solchen krankheiten muß man nicht auff die morgenzeit sehen vñnd warten / Sonder als bald vnd von stundan anwenden/doch nicht gar gleich auffß essen.

Dem Aechzehenden/damit kein betrug vnd falsch mit diesem Terra Sigillata geübt werde / wil ich anzeigen/wie mans proben sol. Man sol ein wenig von diesem Terra Sigillata auff ein messer spiz legen/vnd zu einem liecht heben/ So wirts von stundan anfangen brennen/vnd gar ein vberaus lieblichen geruch (wie es dann auch sonst lieblich riechen thut/wans schon nicht angezündt wirt) von sich geben/vnd ganz vnd gar verbriinnen. Dardurch ist nun leichtlich abzunehmen / wie vnd was gestalt es durch alle glider (das doch ohn allen schaden vnd verletzung derselben beschicht) Penetrirē vnd gehn/auch das vnrein vñnd vberflüssigkeit weg nemen kan/das den groben vnghescheiden Arzeneyen zu thun vn̄m̄glich. Da aber ein neydischer mensch jemandt dise Arzenei verzeiden wolt/mit fürgebung/weils außwendig brünne/so muß sie auch im Leib also brünnen. Hier auff sol man wissen/das es gewislich nit also zugehe/sonder eben der gestalt / als wann man Myrrhen / oder Beyrach oder Mastix bey einem liecht anzündt / so brünnen sie auch/aber beschicht drum̄ im Leib nit/sonder seind (wie man weiß) vn̄shedliche Arzeneyen. Also sol mans auch von diesem Terra Sigillata verstehen. Ferner so ist sie auch zimlich bitter / vnd wann einer wenig dauon versucht/so empfindt er als bald das es von stundan in kopff riecht/

vnd den selben stercke. Vber diß wann mans puluert / vnd dar-
nach in ein Wein oder Wasser thut / so gilbt sie es / vnd schwimbt ein
theil ob wie ein öl oder feyhte / vnd ein theil felt gehn boden. Es zer-
geht zwar von ihm selber auch ein einem Wein oder Wasser / aber
langsam. An der forn ist sie braunlecht vnd rund / vnd mein Namen
mit Einzigem Buchstaben darauff in Triangeln. Es ist auch diese
Terra Sigillata in dem fünffzigsten Jar so gut vnd krefftig / als
in dem ersten Jar / wann mans nur an kein feuchten oder dempffi-
gen orth auff behalten thut /

Liedlich vnd zum Beschluß / da mich etwa ein theil vermeinte
Arzte dieses meinen Berichts / vnd Methodi halben / dieweiln
der selb mit auff die gemein falsch Geygen gerichtet / stumpffi-
ren wurden / Inmassen ich dann wol weiß / das es nicht ganz vnd
gar lehr schlagen wirdt / so sol man wissen / das dasselb von ihnen an-
derst nicht beschicht / als auß neyd / mißgunst vnd vnverstandt / das sie
dieses meines Terra Sigillata eigenschafft vnd wütrekung mit erken-
nen. Aber es ist bisshero meinen Mißgönstern etlichen vermeinten
Arzten das Maul durch die vilfaltige Exempla gestopfft worden / sol
ihnen auch hinfüro durch dieselb gestopfft werden. Der Exempel
seind etlich Tausend / darumb mir zeugnuß geben / Behem / Beyren /
Schwaben / Ober vnd vnder Oesterreich / Pfalz / Werhern / Bo-
densee / Algow / Nortgow / vnd andere Landschafft vnd Herrschafft-
ten mehr. Kan mir auch kein einzige Person (Gott lob) für gestellt
werden / die dardurch wer verderbt worden / wie dann auch keine mit
warheit sagen kan / das sie ihr vbel bekommen / oder ein in opinatum
accidens darzu geschlagen wer / das doch sonst oft von gar lindern
Arzneyen als Cassia / Manna / &c. beschicht. Da sie aber meine wi-
dersächer damit noch nit wollen gestilt sein / sollen sie wissen / das ih-
nen künfftiger zeit (mit verleihung Göttlicher gnaden) durch mich
schriffelich nach der gebür sol auß geleutet werden / wie etwan hievor
auch durch etliche mündlich / auch öffentlich Colloquia beschehen.
Vnd obwoln diese Terra Sigillata wegen seiner fürtrefflichen tu-
gend vnd eigenschafften allein für grosse Potentaten als Keyser /
König / Fürsten vnd Herren gehöret / Hab ichs doch auch dahin rich-
ten wollen / das es die schlechten vnd Armen Leut eben so wol als die
aller gwaltigsten vnd Reichisten genießten vnd theilhaftig sein / vnd
zur notturfft haben mögen / vnd also damit nicht einer Statt vnd
Landt /

Landt/sonder vilen gedient könne werden. Wer demnach die selb
begehrt zu haben / der kan es bey mir an jeso zu Thonawerdt / oder
bey meinem geschlecht / da ich nit mehr im Leben wer/vmb ein gar ge-
ringes gelt (souil sonst gar schlechte Arseneyen inn der Apothecken
kosten thun) Nemlich eins vmb vier basen bekommen / vnd sol kei-
nem versagt werden. Daran hat einer nicht einen schlechten Schatz
für vilerley schwehre krankheiten. Mir zweiffelt auch nit/werden
vil vnder meinen widersachern sein / die darmit künstlen vnd hoffart
treiben werden / vnd darneben fürgeben / es kom̄ von ihrer eignen
kunst her. Mit der zeit wil ich auch menigklich zu nutz vnd frommen
einen Bericht im Truck außgehn lassen / wie ihm ein jeder selb vber
land vñ sonsten (durch Göttliche verleihung) am Aussatz/Schwind
sucht / Podagra / Fistel / Krebs / Wolff / Stein vnd Brüch ohn
schneiden/auch all andern krankheiten/so man bisshero für heylbar
vnd vnheilbar gehalten / von grund auß helffen / vnd mit gar wenig
stücken ein ganze Apothecken haben könne. Das ich aber an
denen jez benendten Krankheiten (durch Gottes
genad) vilen geholffen/darff keines be-
zeugens/dannes Landt
kündig.

Gott allein gib ich Preys vnd ehr/
Der allen meinen feinden wehr.
Liegen sy viel von mir auß neydt/
Wirt ihnen bringen schlechte freudt.
Leichter ist's das gut vnd recht sehenden/
Dann nach zuuolgn vnd besser wenden.

DIXI.

Anno Salutis. M. D. LXXXI.

Getruckt zu S. Gallen / bey
Leonhart Graub.

Handwritten text, likely bleed-through from the reverse side of the page. The text is dense and difficult to decipher due to its orientation and fading.

Handwritten text, possibly a title or a specific section header, located in the middle of the page.

DIXI

M. D. LXXVI

Handwritten text at the bottom of the page, possibly a signature or a date.



